

**BOSNA I HERCEGOVINA
FEDERACIJA BOSNE I HERCEGOVINE
Vlada Federacije Bosne i Hercegovine
Ministarstvo kulture i sporta / Ministarstvo kulture i športa**

IZVJEŠTAJ O RADU

za 2010. godinu

Sarajevo, januar/siječanj 2011.godine

Uvodni dio

Aktivnosti Federalnog ministarstva kulture i sporta u 2010. godini utvrđene su usvojenim Programom rada i Operativnim programom rada za 2010. godinu.

Kako je 2010.godina od strane UN i UNESCO proglašena Međunarodnom godinom približavanja kultura i od strane EU proglašena Godinom borbe protiv siromaštva i društvene isključenosti, Ministarstvo je svoje aktivnosti utvrđene Programom dopunilo sadržajima koji su doprinijeli afirmaciji ovih principa.

Ministarstvo je u 2010. obavljalo upravne, stručne i druge poslove iz nadležnosti Federacije koji se odnose na naučno-istraživačku djelatnost u oblasti zaštite i korištenja kulturno-historijskog naslijeđa, unapređenja muzejske, arhivske, bibliotečne, izdavačke, teatarske, muzičke, likovne, filmske djelatnosti i sporta. Radilo je na razvijanju i omogućavanju rada organizacijama i udruženjima građana u oblasti umjetnosti i kulture, unapređenju kulturnog amaterizma, stvaralaštva mladih, sporta, tehničke i tjelesne kulture, na podršci umjetnicima radi poboljšanja statusa i podršci razvoja talenata od značaja za Federaciju BiH i Bosnu i Hercegovinu.

Zadaci utvrđeni Operativnim programom rada za 2010. realizirani su u normativnom i analitičkom dijelu, po sektorima.

Vlada Federacije BiH usvojila je Strategiju razvoja Federacije Bosne i Hercegovine 2010. - 2020. u kojoj su zastupljene oblasti kulture i sporta i Akcioni plan za implementaciju Strategije. Aktivnosti na provedbi Strategije se provode.

U 2010. godini Ministarstvo je zaprimilo i obradilo 4981 predmet, od čega:

Br. protokola	Org. jedinica	broj primljenih predmeta	izraženo u %
01	Kabinet	215	4,32 %
02	Sekretar	132	2,65 %
03	Sektor za kulturnu baštinu i kulturu	1162	23,32 %
04	Sektor za sport	782	15,70 %
05	Centar za mlade	72	1,45 %
06	Sektor za ekonomske, pravne i opće poslove	1758	35,30 %
	Računovodstvo	781	15,68 %
07	Zavod za zaštitu spomenika	79	1,58 %
UKUPNO PREDMETA		4981	100,00 %

Ministarstvo je u suradnji s domaćim i međunarodnim ekspertima u okviru Programa MDGF „Kultura za razvoj“ pripremlilo Akcioni plan za implementaciju dijela Staretegije kulturne politike Bosne i Hercegovine. Akcioni plan je u postupku provedbe javne rasprave, a odnosi se na ostavrenje slijedećih ciljeva:

1. Razvoj kulturne politike Bosne i Hercegovine,
2. Harmonizirani razvoj kulturnih politika,
3. Pojačana uloga kulture u ekonomskom razvoju Bosne i Hercegovine i
4. Osnažen pristup kulturnoj ponudi i participacija u kulturi.

Slijedeći programske ciljeve i aktivnosti predviđene Akcionim planom, djelatnosti u oblastima kulture i sporta neposredno su obavljane u:

- Zavodu za zaštitu spomenika,
- Sektoru za kulturno-historijsko naslijeđe i kulturu,
- Centru za mlade,
- Sektoru za sport.

Podrška aktivnostima Ministarstva u okviru svog djelokruga rada nastavljena je i u:

- Fondaciji za kinematografiju,
- Fondaciji za nakladništvo / izdavaštvo,
- Fondaciji za bibliotečnu djelatnost,
- Fondaciji za muzičke, scenske i likovne umjetnosti.

ZAVOD ZA ZAŠTITU SPOMENIKA

Zavod za zaštitu spomenika, upravna organizacija Ministarstva i nadležna služba zaštite naslijeđa na nivou Federacije BiH svoj rad temelji na trima osnovnim organizacionim jedinicama:

- Odjeljenje za operativno-tehničku zaštitu,
- Odjeljenje za naučnoistraživački rad,
- Odjeljenje za informaciono-dokumentacione i opće poslove.

Svaka od tri organizacione jedinice operativno je radila na pripremi programa i projekata, stručnom nadzoru i realizaciji sanacije konzervacije, restauracije, rekonstrukcije i revitalizacije objekata kulturno-historijskog naslijeđa.

Aktivnosti planirane u 2010. godini ispunjene su radom na:

- vršenju upravnih, stručnih i drugih poslova zaštite,
- naučnoistraživačkoj djelatnosti,
- rekonstruiranju,
- evidentiranju objekata,
- evidentiranju stanja objekata,
- dokumentiranju,
- digitalizaciji dokumentacije,
- operativnoj i tehničkoj zaštiti i stručnom nadzoru,
- izradi prioritetne liste zaštite na prostoru Federacije BiH,
- pripremanju zakonskih propisa,
- organizaciji programa manifestacije *Dani europskog naslijeđa*,
- tehničkom i stručnom nadzoru nad utroškom dodijeljenih sredstava.

Stručnjaci Zavoda za zaštitu spomenika vršili su stručni nadzor nad pravilnom primjenom zakonske regulative u oblasti zaštite, stručni nadzor nad realizacijom programa i projekata i na implementaciji sredstava namijenjenih za zaštitu objekata kulturno-historijskog naslijeđa.

Učestvovali su u pokrenutim upravnim postupcima izdavanja suglasnosti i građevinskih dozvola davanjem stručnih mišljenja iz aspekta zaštite kulturno-historijske baštine o programima i projektima izrađenim od strane drugih pravnih i fizičkih lica. Predstavnici Zavoda su u svrhu izdavanja građevinskih dozvola izdali oko 150 stručnih mišljenja potrebnih u upravnom postupku konzervacije, restauracije, sanacije i prezentacije nacionalnih spomenika..

Informaciono-dokumentaciono odjeljenje radilo je na evidentiranju i čuvanju dokumentacije. Veliki broj projekata je skeniran. U digitalnoj formi spremljeno je deset brojeva „Naših starina“ stručne publikacije Zavoda. „Naše starine“ bit će postavljene na veb stranicu Ministarstva - Zavoda što je dio programa digitalizacije arhivske dokumentacije kojom raspolaže Zavod. Stručnjaci Zavoda su također radili na prikupljanju materijala za fototeku, hemeroteku, biblioteku, videoteku i na drugim dokumentacijskim zbirkama.

U 2010.godini Zavod je operativno, po fazama, radio na slijedećim objektima:

Javni objekti:

- Vođen stručni nadzor na rekonstrukciji ulaznih vrata na Jevrejskom groblju u Sarajevu
- Završeni radovi na I. fazi obnove Spomen park Vraca u Sarajevu
- Završena I faza obnove Partizanskog spomen groblja u Mostaru
- Vođen stručni nadzor na obnovi Stare željezničke stanice u Prači-Goražde
- Vođen stručni nadzor na provođenju arheoloških istraživanja u Firuz-begovom hamamu u Sarajevu
- Završeni su radovi na sanaciji ribnjaka u parku prirodnjačkog paviljona u Zemaljskom muzeju BiH u Sarajevu
- Završena izrada projekta za Zgradu financija u Jajcu
- Vođen stručni nadzor na rehabilitaciji objekta Male vijećnice, Odžak

Sakralni objekti:

- Vođen stručni nadzor na rekonstrukciji ulaznih vrata na Jevrejskom groblju u Sarajevu
- Vođen stručni nadzor i urađen projekt za II fazu obnove Džamije u Podgori, Breza
- Vođen stručni nadzor na sanaciji Džamije u Šenkovićima, Novi Travnik
- Vođen stručni nadzor nad izvedbom kupole na Džudžadžaferovoj džamiji u Tomislavgradu
- Vođen stručni nadzor na tekućem održavanju Soko džamije u Gračanici
- Vođen stručni nadzor na tekućem održavanju Huseinija džamije u Gradačcu
- Vođen stručni nadzor na tekućem održavanju Balaguša džamije u Livnu
- Stručni nadzor na izvođenju radova na ogradi i izrada projekta konzervacije mihraba Musale u Kamengradu, Sanski Most
- Vođen stručni nadzor na radova u interijeru Ferhat-begova džamija u Tešnju
- Izrada projekta konstruktivne sanacije Semiz Ali-pašino turbe u Prači
- Vođen stručni nadzor Džamija u Seonici, Konjic
- Izrada projekta stolarije i stručni nadzor na obnovi Džamije Handanije u Pruscu
- Završena izrada projekta rekonstrukcije Džamija Kfajije Pruščaka, Prusac
- Izrada projekta stolarije i stručni nadzor na tekućem održavanju Careve džamije, Sarajevo
- Vođenje stručnog nadzora na izgradnji Bakr Babine džamija, Sarajevo

- Vođenje stručnog nadzora na čišćenju munare Bašćaršijske džamije, Sarajevo
- Završen stručni nadzor na konzervaciji zida Bezistana i arheološka istraživanja na lokalitetu Tašlihan, Sarajevo
- Završena izrada Projekta rekonstrukcije abdesthane i vođenje stručnog nadzora na Čaršijskoj džamiji u Kladnju
- Vođen stručni nadzor na završetku fasade i II. faze obnove, te nadzor na obnovi interijera Crkve Sv. Ilije Kruševo, Mostar
- Vođen stručni nadzor na konstruktivnoj sanaciji kripe Franjevačkog samostana Kraljeva Sutjeska, Kakanj
- Završena izrada projekta i započeta II. faza sanacije Stare crkva Sv. Mihovila u Varešu
- Vođenje stručnog nadzora na obnovi i restauraciji interijera Katedrale Srca Isusova, Sarajevo
- Vođenje stručnog nadzora na zaštiti pokretnih dobara u Franjevačkom samostanu Kreševo
- Izrada projekta konzervacije i stručni nadzor na arheološkim istraživanjima Kapela s franjevačkom kućom u Podbili, Posušje
- Stručni nadzor na zaštiti pokretnih kulturnih dobara Franjevačkog muzeja, Livno
- Završena izrada projektne dokumentacije rekonstrukcije Stare biskupske rezidencija u Vukodolu, Mostar
- Završeni radovi na obnovi na i zvoniku Crkve Uznesenja Blažene Djevice, Rama-Šćit
- Vođenje stručnog nadzora na sanaciji Crkve Sv. Trojstva u Blagaju
- Vođenje stručnog nadzora na sanaciji interijera Saborne crkve Presvete Bogorodice u Sarajevu
- Vođenje stručnog nadzora na rehabilitaciji Saborne crkve u Mostaru
- Vođenje stručnog nadzora na zvoniku Stare pravoslavne crkve u Mostaru
- Vođenje stručnog nadzora na sanaciji kompleksa Stare crkve na Bašćaršiji u Sarajevu
- Vođenje stručnog nadzora na tekućem održavanju Manastira Vožuća, Zavidovići
- Završena izrada projekta obnove i revizija projektne dokumentacije za Crkvu Sv. Vasilija Ostroškog u Blagaju

Arheološki lokaliteti i nekropole

Arheološka istraživanja obavljana su u suradnji s arheolozima Zemaljskog muzeja, ANUBiH-a, Muzeja Sarajeva. Zavod je sudjelovao u istraživanjima, evidentirajući i dokumentirajući rezultate, a bio je i koordinator programa i projekata na osnovu kojih su stručnjaci Zavoda radili na projektima konzervacije i revitalizacije.

- Završen je projekt konzervacije ulaznog bedema Helenističkog grada Daorson u Ošanićima kod **Stoca**
- Vođenje stručnog nadzora nad arheološkim istraživanjima na Starom gradu Jajce

- Završena izrada projekta konzervacije i stručni nadzor nad konzervatorskim radovima Nekropola Radimlja, Stolac – završeno
- Završena izrada projekta konzervacije za Nekropolu stećaka u Kruševu, Mostar
- Završena II. kampanja arheoloških istraživanja lokaliteta Halepić kod Glamoča, dostavljen izvještaj
- Završena izrada projekta konzervacije i stručni nadzor nad konzervatorskim radovima Nekropola stećaka Sovići na Blidinju, završeno

Stari gradovi:

Rađena operativna zaštita i konzervacija bedema po fazama na starim gradovima:

- Tešanj
- Ostrožac
- Vratnik
- Ključ
- Srebrenik
- Bužim
- Počitelj
- Stjepangrad
- Ljubuški
- Prusac

Stambeni objekti:

- U toku izrada projekta sanacije i rekonstrukcije Abdibegovića kuće u Pruscu
- U toku izrada projekta sanacije i rekonstrukcije Musafirhane u Fojnici
- Završena izrada projekta sanacije i priprema tenderske dokumentacije za Kršlakovu kuća u Jajcu
- Vršenje stručnog nadzora nad radovima uz pripremu projektne dokumentacije po fazama i prema raspoloživim sredstvima za Stambeni kompleks Begovina u Stocu
- Vršenje stručnog nadzora nad radovima uz pripremu projektne dokumentacije po fazama i prema raspoloživim sredstvima za Stambeni kompleks Velagićevina u Blagaju

Zavod za zaštitu spomenika je odlukom Vlade Federacije BiH određen za nositelja aktivnosti na radovima preventivnih arheoloških istraživanja na trasi autoputa Koridor Vc o čemu je s Direkcijom za ceste Federacije BiH potpisan ugovor o dugotrajnoj suradnji.

Zavod za zaštitu spomenika je nastavio suradnju s organizacijama UNESCO i UNDP na zajedničkim projektima obnove i zaštite objekata kulturnog naslijeđa. Projekti konzervacije napravljeni u 2009.godini za:

- Nekropolu stećaka Radimlja kod Stoca i
- Bedeme Starog Stjepan-grada u Blagaju

implementirani u 2010.godini.

Sredstva koja su ove organizacije osigurale za konzervaciju Starog grada Tešanj također su implementirana u suradnji sa Zavodom. Nastavljena je suradnja s Fondacijom za održivi razvoj, OdRaz Sarajevo.

Zavod je na Godišnjoj skupštini održanoj 14. decembra 2010.godine, postao pridruženi član Nacionalnog komiteta ICOMOS u Bosni i Hercegovini.

Tema Manifestacije «Dani evropskog naslijeđa» 2010. godine bila je Stećak, nadgrobni srednjovjekovni spomenik, fenomen kulturne baštine Bosne i Hercegovine. Manifestacija je održana u Konjicu 06. i 07. oktobra/listopada 2010. godine.

U 2010. godini Zavod nije sudjelovao na V Regionalnoj konferenciji o suvremenom pristupu zaštiti kulturne i prirodne baštine u Banjaluci, pod pokroviteljstvom Ministarstva kulture RS, a u organizaciji Republičkog Zavoda za zaštitu kulturno-istorijske i prirodne baštine RS. Razlog je neuklapanje vremenskih termina. Ipak, naš Zavod i Zavod RS su razmijenili materijale koji su bili prezentirani na ovogodišnjoj konferenciji.

Priprema XXII. broja stručnog časopisa i godišnjaka *Naše starine*, je tehnički završena. Zbog nedostatka potrebnih sredstava, izdavanje časopisa je pomjereno u prvu polovinu 2011.godine.

Početakom 2010. godine kako je i planirano, štampana je Monografija Federalnog ministarstva kulture i sporta pod nazivom „Zaštita baštine 2003-2009.“ u kojoj je Zavod prezentirao dio svog poslijeratnog rada na restauraciji i očuvanju kulturno-historijskog i graditeljskog naslijeđa, za koje je Federalno Ministarstvo kulture i sporta sufinansiralo programe i projekte od 2003. do kraja 2009. godine.

SEKTOR ZA KULTURNO - HISTORIJSKU BAŠTINU I KULTURU

Od ukupno 4981 predmeta koji su u 2010. godini protokolirani u Ministarstvu, Sektor za kulturno - povijesnu baštinu i kulturu dobio je na obradu 1162 ili 23,32 % predmeta. Od toga su 482 ili 41,5 % predmeta zahtjevi za sufinansiranje programa kulture ili kulturno – povijesne baštine, kako slijedi:

Oblast	broj predmeta	traženo sredstava	dodijeljeno sredstava	dodijeljeno u odnosu na traženo u %
Kultura	268	7.132.906,59	1.472.999,00	20,66 %
Kulturna baština	214	9.090.718,97	1.539.999,00	16,94 %
UKUPNO:	482	16.223.625,56	3.012.998,00	18,60 %

Za zaštitu i obnovu objekata kulturne baštine ostvarena su dodatna sredstva iz rezerve Vlade Federacije Bosne i Hercegovine u visini od 50.000,00 KM za obnovu Saborne crkve u Mostaru i Sredstva turističkih zajednica ostvarena iz članarina u turističkim zajednicama i boravišnih pristojbi u visini od 2.879.439,31KM. Ukupna sredstva za zaštitu kulturno historijskog i graditeljskog naslijeđa u 2010. godini tako su iznosila 5.942.437,31KM što iznosi ukupno 36,36 % od očekivanih sredstava.

Važno je napomenuti da na velikom broju zahtjeva nisu bilo navedena očekivana sredstva te se iz toga vidi da Ministarstvo s dodijeljenim sredstvima nije moglo ispuniti više od 10 % očekivanja za sufinansiranje kandidiranih programa i projekata u oblasti kulture i kulturno historijske baštine.

Na prijedlog ovog ministarstva, iz IPA fondova za 2009. i 2010. godinu za obnovu Gradske vijećnice u Sarajevu odobreno 7.500.000,00 €.

Također, na prijedlog Ministarstva, iz sredstva UNESCO komponente Programa MDGF „Kultura za razvoj“, za tri vjerska objekta simbola interkulturalizma u Bosni i Hercegovini, uz potpisivanja Memoranduma o suradnji s tri najveće vjerske zajednice u BiH, dodijeljeno je po 200.000,00 USA dolara za obnovu:

- Saborne crkve u Mostaru,
- Ferhadije džamije u Banjaluci i
- Franjevačkog samostana Plehan kod Dervente, (izgradnja muzejskog prostora u koji će biti smještena zbirka umjetnina i pokretnosti proglašenih nacionalnim spomenikom Bosne i Hercegovine).

Upravni, stručni i drugi poslovi u Sektoru ostvareni su:

- prikupljanjem i vođenjem baze podataka o programima, projektima, organizacijama, manifestacijama, djelatnicima i umjetnicima u Federaciji Bosne i Hercegovine,
- praćenjem i vrednovanjem programa i projekata kulture i kulturne baštine, aktivnosti institucija, udruga i organizacija u oblasti kulture,
- finansijskom podrškom programima i projektima kulture, od značaja za Federaciju Bosne i Hercegovine i Bosnu i Hercegovinu,
- finansijskom podrškom programima i projektima koje kandidiraju udruge građana i organizacije u oblasti kulture i kulturne baštine,
- nalaženjem metoda bolje i učinkovitije raspodjele proračunskih sredstava za sufinansiranje projekata kulture i kulturne baštine, koji su značajni za Federaciju BiH i Bosnu i Hercegovinu,
- razvojem međusobne suradnje i uvezivanjem institucija kulture radi ostvarivanja kvalitetnijih programa za veći broj korisnika,
- strateškim djelovanjem, koordinacijom s resornim ministarstvima u oblasti kulture na drugim razinama,
- stalnim radom na aktualnoj bazi podataka u kulturi, vođenjem kalendara kulturnih događanja, podrškom inovativnim samoodrživim programima, i na druge načine.

Nastavljeno je ostvarivanje ranije utvrđenih ciljeva rada Sektora za kulturno-historijsko naslijeđe i kulturu:

- kulturni razvoj Federacije BiH i Bosne i Hercegovine,
- provedba Strategije kulturne politike Bosne i Hercegovine,
- utvrđivanje polazišta za izradu osnova politike razvitka kulture Federacije Bosne i Hercegovine,
- provedba važećih, i od Bosne i Hercegovine ratificiranih konvencija u oblasti kulture,
- ispunjenje ugovora o međunarodnoj kulturnoj suradnji u dijelu koji se odnosi na Federaciju BiH,
- provedba Aneksa 8 međunarodnog sporazuma za mir u Bosni i Hercegovini,
- provedba Zakona o provedbi Odluka o proglašenju objekata nacionalnim spomenicima,
- provedba Zakona o federalnim ministarstvima,
- prepoznavanje manifestacija, programa i projekata od značaja za Federaciju BiH i Bosnu i Hercegovinu, njihov razvitak, poticanje razmjene i realizacije u kooperaciji ili koprodukciji,

- potpora manifestacijama kulture čiji je status potvrđen od međunarodnih asocijacija
- provedba važećih državnih i federalnih zakona u oblastima kulture i kulturno-historijskog naslijeđa,
- afirmacija umjetničkog stvaralaštva od značaja za Federaciju BiH i Bosnu i Hercegovinu,
- ispunjenje individualnih i kolektivnih kulturnih potreba građana Federacije BiH i Bosne i Hercegovine,
- razvoj svih kulturnih djelatnosti, potpora inovativnosti i novim medijskim kulturama,
- rad na osviještenju o potrebi razvoja prometne, zdravstvene i ekološke kulture,
- promoviranje i afirmacija kulture i umjetnosti od značaja za Federaciju BiH i Bosnu i Hercegovinu,
- potpora afirmaciji i angažmanu mladih, odgovorna priprema mladih za sudjelovanje u kulturnom životu Federacije BiH i Bosne i Hercegovine,
- uvrštavanje u Program financiranja većeg broja programa i manifestacija koje će znati da će biti financirane i u narednom periodu, ako budu uspješne i kvalitetne, a program se razvijao i rastao.

Kulturno - povijesna i graditeljska baština

Zaštitu kulturno-historijskog naslijeđa u skladu s utvrđenim Programom rada za 2010. godinu i nadležnostima Ministarstva provodili su:

- Sektor za kulturno-historijsko naslijeđe i kulturu,
- Zavod za zaštitu spomenika FBiH.

U Sektoru je u 2010. godini evidentirano 214 zahtjeva za sufinansiranje projekata obnove i zaštite kulturno-historijske i kulturne baštine. S obzirom na činjenicu da je iznos očekivanih sredstava daleko manji od raspoloživih, da je za obnovu i zaštitu kandidirano daleko više objekata nego što je to moguće, o raspodjeli sredstava odlučivalo se temeljem:

Općih kriterija:

- Kvalitet kandidiranih programa i projekata i
- njihov doprinos u podizanju općeg nivoa u oblasti kulturnog i graditeljskog naslijeđa,
- doprinos uspješnoj prezentaciji i afirmaciji Federacije Bosne i Hercegovine i Bosne i Hercegovine,
- ekonomičnost,
- osigurano sufinansiranje kantonalnih institucija kulture i lokalnih zajednica,
- ravnomjerna regionalna i nacionalna zastupljenost.

Posebni kriteriji:

- Vrijednost objekta (historijska, arhitektonska, umjetnička, kulturna, duhovna, prostorna),
- stanje objekta (potrebna preliminarna zaštita, konzervacija, sanacija, restauracija, adaptacija, revitalizacija i prezentacija),
- prioritet i neophodnost radova, u skladu sa stanjem objekata koji imaju status nacionalnih spomenika Bosne i Hercegovine,

- zaštita i očuvanje pokretnih i nematerijalnih kulturno-historijskih dobara,
- nastavak započetih radova na objektima kulturnog naslijeđa.

Prednost kod izbora za sufinansiranje zaštite i obnove su imali objekti:

- koje je u skladu s godišnjim planom predložio Zavod za zaštitu spomenika,
- koji imaju završenu projektnu dokumentaciju i potrebne dozvole,
- koji trebaju sredstva za izradu projekata i stručnu podršku,
- koji će doprinijeti očuvanju pokretnih i nepokretnih kulturnih dobara,
- čiji je završetak izvjestan u kraćem periodu, koji je samoodrživ i koji će doprinijeti ekonomskom razvoju društvene zajednice.

Doneseno je 59 Odluka o dodjeli sredstava, kako slijedi:

Izrada projekata i izvođenje radova za zaštitu javnih objekata kulturne baštine :	3
Izrada projekata i izvođenje radova za zaštitu islamskih sakralnih objekata kulturne baštine :	6
Izrada projekata i izvođenje radova za zaštitu katoličkih sakralnih objekata kulturne baštine :	4
Izrada projekata i izvođenje radova za zaštitu pravoslavnih sakralnih objekata kulturne baštine :	3
Izrada projekata i izvođenje radova za zaštitu arheoloških područja i nekropola :	7
Izrada projekata i izvođenje radova za zaštitu Starih gradova značajne kulturne baštine :	5
Izrada projekata i izvođenje radova za zaštitu stambenih objekata značajne kulturne baštine :	3
Zaštita pokretnog kulturno-historijskog naslijeđa	11
Zaštita nematerijalnog kulturno historijskog naslijeđa, Programi međunarodne suradnje i organizacija Manifestacije „Dani europskog naslijeđa“	5
Dio sredstava (7,5 % od ukupnog Transfera) realizirano je interventno, za provedbu hitnih mjera zaštite, programe, projekte i završetak započetih i ugovorenih radova.	12

Stručni nadzor na realizaciji Odluka provodio je Zavod za zaštitu spomenika. Nadzor nad namjenskim utroškom sredstava vršio je obrađivač predmeta u suradnji s djelatnicima Zavoda i Komisijom za praćenje namjenskog utroška sredstava. S obzirom na činjenicu da se projekti zaštite objekata kulturno-povijesne i graditeljske baštine realiziraju po fazama i višegodišnji su, Sektor kontinuirano prati realizaciju projekata do njihove konačne realizacije.

Također, Sektor je provodio aktivnosti, a Ministarstvu civilnih poslova Bosne i Hercegovine kao tijelu nadležnom za izvještavanje o provedbi međunarodnih Konvencija u oblasti zaštite kulturno povijesne baštine i koordiniranje, pripremao Izvještaje o provedbi Konvencija u dijelu koji se odnosi na Federaciju BiH.

U suradnji sa Zavodom za zaštitu spomenika i Ministarstvom turizma i okoliša Federacije Bosne i Hercegovine, Sektor je pripremio Odluku o usvajanju programa raspodjele sredstava za očuvanje, konzerviranje i obnavljanje kulturno-povijesnog naslijeđa, očuvanje, zaštitu i obnavljanje prirodnog naslijeđa i unapređenje i razvoj turizma, ostvarenih od članarina u turističkim zajednicama i boravišnim pristojbama za period 01.01- 31.12.2009. godine.

U svrhu realizacije Odluke izrađeno je 57 Naloga kojima su turističke zajednice bile dužne uplatiti sredstva korisnicima. Korisnici su bili dužni pod nadzorom Zavoda za zaštitu spomenika sredstva namjenski i kvalitetno utrošiti i dostaviti izvještaje Ministarstvu. Ministarstvo je dužno do kraja pratiti realizaciju sredstava i o realizaciji sredstava izvijestiti turističke zajednice.

Iznimnim uspjehom u 2010. smatramo pozitivno djelovanje Ministarstva vezano za iniciranje i realizaciju Pilot program naslova: ARCH Stolac - „Naslijeđe kao most između zajednica. Rekonstrukcija arhitektonskog naslijeđa u centru grada Stoca – održivo oživljavanje i razvoj zajednice razjedinjene ratom” za koje je Europska unija izdvojila 1.500.000,00 €, a koje će biti realizirane u naredne dvije godine.

Sektor je u suradnji s lokalnim zajednicama i Zavodom za zaštitu spomenika, za ciklus financiranja IPA 2012 i 2013. godine predložio projekte obnove:

- Zgrade Crvenog krsta / Crvenog križa u Sarajevu,
- Partizanskog spomen groblja u Mostaru,
- Starog grada Tešanj i
- Starog grada Bužim.

Dani europskog naslijeđa 2010. godine održani su u Konjicu. Tema je bila Stećak. Povod za izbor teme je aktualna nominacija stećka za upis na Listu svjetske baštine UNESCO. Dodijeljene su Povelje osobama i ustanova koje su doprinijele zaštiti kulturne baštine. U 2010. Godini Povelje su dobili:

- g. Džemil Jakić iz Novog Travnika
- mr. Lidija Fekeža Martinović iz Sarajeva
- prof.dr. Lubravko Lovrenović iz Sarajeva
- prof.dr. Ljiljana Ševo iz Banje Luke
- Općina Konjic i
- g. Emir Bubalo, općinski načelnik Konjica.

Zavod za zaštitu spomenika je prihvatio obavezu za kandidiranje teme, mjesta i sadržaja Dana europske baštine koji će biti održani 2011. godine.

Trajno je razvijana suradnja i koordinacija s:

- Državnom komisijom za UNESCO,
- Organizacijama UN (UNESCO, UNDP),
- Komisijom/Povjerenstvom za očuvanje nacionalnih spomenika,
- Ministarstvom civilnih poslova Bosne i Hercegovine,
- Ministarstvom prostornog uređenja Federacije BiH,
- Ministarstvom turizma i okoliša Federacije BiH,

- Kantonalnim resornim ministarstvima,
- Kantonalnim zavodima za zaštitu spomenika, agencijama i drugim institucijama koje se bave zaštitom kulturne baštine Bosne i Hercegovine.

Kultura

Poslovi iz oblasti kulture ostvareni su u Sektoru za kulturno-historijsko naslijeđe i kulturu, često u suradnji sa Sektorom za ekonomsko - finansijske i opće poslove te Centrom za mlade.

Od ukupno 482 zahtjeva za sufinansiranje programa i projekata koji su tijekom 2010. godine zaprimljeni u Sektor, 268 ili 55,6 % odnosi se na zahtjeve za sufinansiranje programa kulture.

Zahtjevi su evidentirani i prvi put vođeni po međunarodnim standardima i usvojenoj metodologiji u kojoj su podnosioci zahtjeva razvrstani kao: javne ustanove (1), udruge građana i privatne osobe (2) i druge razine vlasti (3).

U skladu s objavljenim općim i posebnim kriterijima, iz Transfera za kulturu od značaja za Bosnu i Hercegovinu podržano je 30 programa, od čega:

Manifestacija kulture, festivala	
članovi EFA Asocijacije europskih festivala	2
Teatarskih i scenskih festivala i programa	12
Likovnih programa	3
Književnih manifestacija	2
Filmskih festivala i projekata	3
Programa mladih	4
Ostalih	4

Iz Transfera za udruge građana i organizacije kulture od značaja za Federaciju BiH podržano je 15 programa, od čega:

Muzičkih festivala i programa	2
Književnih manifestacija	6
Filmskih festivala i projekata	1
Programa mladih	3
Vjerskih programa	1
Programa kulturnog amaterizma	1
Programa tehničke kulture	1

Federalno ministarstvo kulture i sporta programe i projekte od značaja za Federaciju Bosne i Hercegovine i Bosnu i Hercegovinu sufinanciralo je i realiziralo prema spomenutim općim i usvojenim posebnim kriterijima:

- afirmacija kulturnog i umjetničkog stvaralaštva,
- interes kulturne javnosti,
- dugogodišnji kontinuitet; inovativnost,
- uspjesi na međunarodnom i domaćem planu,
- poticanje razmjene; realizacija u kooperaciji ili koprodukciji,
- doprinos angažiranju i afirmaciji mladih.

Sredstva su dodijeljena temeljem podnesenog zahtjeva s Programom i finansijskim planom.

U skladu s navedenim kriterijima, programima kulture od značaja za Federaciju BiH i Bosnu i Hercegovinu proglašeni i u skladu s tom činjenicom sufinancirani su:

- Sarajevska zima, Sarajevo
- Mostarsko proljeće, Mostar
- Festival bosansko-hercegovačke drame, Zenica
- Festival komedije Mostarska liska, Mostar
- Pozorišne / Kazališne igre, Jajce
- Festival prijateljstva, Goražde
- Tuzlanski pozorišni dani, Tuzla
- Festival scenskih umjetnosti Bihaćko ljeto, Bihać
- Festival animiranog filma NAFF, Neum
- Sarajevo Film Festival, Sarajevo
- Međunarodni teatarski festival MESS, Sarajevo
- Zimski kamp animiranog filma, Neum
- Ljetni kamp animiranog filma, Sarajevo
- Umjetničke radionice u Domu mladih, Sarajevo
- Programi East West Centra, Sarajevo
- Dani hrvatskog filma, Orašje
- Dani Ajvatovice, Travnik
- Muzički festival Bosna, Sarajevo
- JAZZ fest, Sarajevo
- Talent Campus, Sarajevo
- Europski festival dizajna, Sarajevo
- Sarajevski dani poezije, Sarajevo
- Šopovi dani na Plivi, Jajce
- Gradačaćki književni susreti, Gradačac
- Šantićeve večeri poezije, Mostar
- Susreti Zuje Dizdarevića, Fojnica
- Šimićevi susreti u Drinovcima, Grude
- Slovo Gorčina, Stolac
- Nagrada Mithat Begić, Sarajevo
- Dani kosidbe, Kupres

te programi podržani interventnim sredstvima:

- Produkcija filma Belvedere, Sarajevo
- Program Nošnje i igre, Kiseljak
- Oživljavanje programa mladih, Gradačac
- Smotra folkloru Amateri svome gradu, Drvar
- Slikarska kolonija Vidoši, Livno

- Međunarodni ljetni karneval, Čapljina
- Gostovanje predstave Žaba u inozemstvu
- Izložba Edina Numankadića u Pragu
- Dani filma, Mostar
- Međunarodni festival folklor, Sapna
- Programi tehničke kulture Asocijacije inovatora u BiH
- Programske aktivnosti Franjevačke mladeži, Sarajevo

Vrijedna je spomena činjenica da su svi programi dobili sredstva prema Kalendaru kulturnih događaja, terminima održavanja i u skladu s raspoloživim sredstvima, na vrijeme.

Posebnu zahvalnost dugujemo Ministarstvu financija i Trezoru Federacije Bosne i Hercegovine koji su pratili sve zahtjeve Ministarstva. Rezultat ovakvog rada je znatno poboljšana kvaliteta programa i sigurnost organizatora.

Ministarstvo je sudjelovalo u programima više projekata međunarodne suradnje: pripremio sudjelovanje ministarstva na Šestoj konferenciji ministara kulture Jugoistočne Europe koje je održano u aprilu 2010. godine u Podgorici i Cetinju – Republika Crna Gora, pripreme za izložbu mladih suvremenih umjetnika zemalja Jugoistočne Europe koja je održana kao preteći program uz Ministarsku konferenciju, drugim programima u suradnji s Ministarstvom civilnih poslova BiH.

Usklađivanje kulturne politike s europskim zemljama predstavlja jedan od strateških ciljeva na planu utvrđivanja kulturne politike i pravaca strateškog razvoja kulture na svim nivoima djelovanja. Ministarstvo je nastavilo sudjelovanje u MDGF Programu „Kultura za razvoj“ u svim tijelima i u četiri radne grupe:

1. Izrada Akcionog plana za provedbu Strategije kulturne politike BiH,
2. Izrada kulturnog portala,
3. Reforma kulturne statistika i
4. Radna grupa za monitoring i evaluaciju.

U prilogu je skraćen Godišnji izvještaj o napretku Programa MGDF Kultura za razvoj Fonda za postizanje Milenijumskih razvojnih ciljeva.

CENTAR ZA MLADE

Pitanja mladih su intersektoralna i tiču se većeg dijela populacije bh. društva, odnosno, zakonske regulative, kulture, sporta, obrazovanja, ekonomije, zapošljavanja, zdravlja, delikvencije, narkomanije, sudjelovanja mladih u radu vlada, suradnje s svim nivoima vlasti, informiranja mladih, itd.

Centar za mlade federalnog ministarstva kulture i sporta će svoje aktivnosti voditi kroz nekoliko područja djelovanja:

- Koordinacija rada sa svim nivoa vlasti u Bosni i Hercegovini, radi poboljšanja položaja mladih i dostizanju evropskog standarda za život mladih u Bosni i Hercegovini,
- podrška aktivnostima u vezi sa procedurom usvajanja Zakon o mladima Federacije Bosne i Hercegovine, razvoj omladinske politike u Federaciji,

- poticanje kulturnih i sportskih aktivnosti u interesu zadovoljavanja potreba mladih, posebno u malim sredinama, iznalaženje vidova suradnje organa i tijela vlasti i omladinskih organizacija,
- osiguravanje namjenskih sredstava za projekte mladih, podrška i povezivanje projekata i programa mladih u FBiH, podrška mladim talentima prema općim i posebnim kriterijima,
- suradnja sa omladinskim organizacijama i međunarodnim organizacijama koje se bave problematikom mladih te aktivno učešće na raznim omladinskim forumima, konferencijama, seminarima.

Centar za mlade će osigurati razvoj projekata koji se odnose na prezentaciju, edukaciju, uključivanje i upoznavanje mladih ljudi sa mogućnostima školovanja, kroz kontinuirane projekte sa mladima iz Federacije Bosne i Hercegovine (Kamp animacije - zimski i ljetni). Nastavak rada na projektima podrška programima mladih u zaštiti kulturne baštine, jačanje svijesti kod mladih o potrebi i očuvanju kulturne baštine Bosne i Hercegovine te aktivnosti mladih koje doprinose obrazovanju i edukaciji mladih, realizacija programa „Mladi i naslijeđe“ manifestacije“ Dani europskog naslijeđa”. Nastavak podrške programima mladih koji doprinose angažiranju i afirmaciji mladih u kulturi, podrška razvijanju manifestacija, programa i projekata mladih u oblasti kulture, koji doprinose edukaciji mladih, stipendiranje, uključivanje, zapošljavanje i volonterski rad mladih.

Podrška i razvoj programa za mlade u oblasti sporta; potpora školskom sportu i vaspitno obrazovnim, razvojnim i edukacionim programima za mlade kroz projekte koji doprinose očuvanju zdravlja i vaspitanja mladih, podrška sportskim programima Centra za mlade te stipendiranje mladih talentiranih sportista.

Centar za mlade će nastaviti, aktivnosti koje vode ka poboljšanju standarda za život mladih u Bosni i Hercegovini.

SEKTOR ZA SPORT

Utvrđenim Programom rada u oblasti sporta nastavljene su aktivnosti na podsticanju i unapređenju sporta, a kao prioriteti bili su strateški ciljevi kojima smo željeli da naša zemlja postane sportski razvijena i da sport doprinese što većem uključivanju stanovništva u sistematsku sportsku aktivnost i dostizanju vrhunskih sportskih rezultata koji će obezbijediti dostojno reprezentovanje naše zemlje na međunarodnim sportskim takmičenjima.

U saradnji sa Ministarstvom civilnih poslova i kantonalnim ministarstvima nastavljene su aktivnosti na usaglašavanju zakonske regulative sa Zakonom o sportu u Bosni i Hercegovini i obezbjeđenju preduslova za razvoj sporta i jedinstveno organizovanje sporta na nivou Federacije Bosne i Hercegovine i zemlje u cjelini. Kako je Ustavom Federacije Bosne i Hercegovine sportska djelatnost u nadležnosti kantona to je pružena podrška kantonima u aktivnostima na izmjenama i dopunama njihovih zakona o sportu i nastavljeno usaglašavanje o pitanjima koja treba regulisati zakonom na nivou Federacije.

Kako je Parlamentarna skupština Federacije Bosne i Hercegovine usvojila Strategiju razvoja sporta u Bosni i Hercegovini za period 2010-2014. godina koja daje strateške smjernice i plan djelovanja razvoja sporta u Bosni i Hercegovini u skladu sa Bijelom knjigom za sport u Evropskoj uniji i drugim međunarodnim dokumentima koji uređuju oblast sporta nastavljene su aktivnosti i dogovaranja sa kantonima oko usvajanja dokumenta koji će izraziti neophodno potrebno jedinstvo sporta u cilju ostvarivanja njegovih izvornih ciljeva. Nakon toga pristupit će se izradi Zakona o sportu u

Federaciji Bosne i Hercegovine koji će obezbijediti provođenje utvrđenih ciljeva i način organizovanja sportskih asocijacija na nivou Federacije Bosne i Hercegovine. Osnovna polazišta su poboljšanje sistema organizovanja i upravljanje sportom, unapređenje vrhunskog sporta, unapređenje sporta za sve, planiranje razvoja izgradnje sportskih sporta u skladu sa evropskim standardima, stvaranje materijalnih preduslova za razvoj sporta i promocija sporta i vrijednosti u njemu.

Utvrđene aktivnosti na izradi Zakona o sportu Federacije Bosne i Hercegovine nisu u potpunosti završene. U skladu sa obavezama iz Zakona o sportu u Bosni i Hercegovini i nadležnostima u sportu utvrđenim Ustavom Federacije Bosne i Hercegovine pristupilo se definisanju pitanja koja će zakonski regulisati na nivou Federacije i dogovaranju sa kantonima. Kod usaglašavanja odredaba Zakona o sportu Federacije Bosne i Hercegovine uzeti su obaveze koje proističu i iz Aneksa 8 Dejtonskog mirovnog sporazuma i zakonskih propisa koje eksplicitno utvrđuju obaveze i dužnosti na nivou entiteta. Zakon o sportu u Bosni i Hercegovini je eksplicitno propisao obavezu entiteta u organizaciji sporta na nivou entiteta, sistemu takmičenja, izgradnji, održavanju i korištenju sportskih objekata, uređivanje jedinstvenog informacionog sistema na nivou sporta, zdravstvenu zaštitu sportista, saglasnost za organizaciju međunarodnih sportskih takmičenja i upravni i stručni nadzor nad provođenjem Zakona o sportu na nivou Federacije Bosne i Hercegovine. Zbog predizborne i izborne aktivnosti ove aktivnosti nisu okončane.“

U saradnji sa Ministarstvom civilnih poslova BiH i nadležnim ministarstvom za sport u RS okončane su aktivnosti na osnivanju Agencije za antidoping kontrolu. Na osnovu odredaba Zakona o sportu u Bosni i Hercegovini u saradnji sa Agencijom, Ministarstvom civilnih poslova BiH i nadležnim ministarstvom za sport u RS pripremljen je i upućen u parlamentarnu proceduru Zakon o spriječavanju dopinga u sportu u Bosni i Hercegovini. U skladu sa Međunarodnim standardima i svjetskim antidoping kodeksom Zakon će se primjenjivati na nivou cijele Bosne i Hercegovine.

Federalno ministarstvo kulture i sporta je u saradnji sa Društvom psihologa u Federaciji Bosne i Hercegovini organizovali Konferenciju o sprečavanju nasilja na sportskim takmičenjima. Cilj je bio da se definišu konkretne mjere koje bi doprinijele smanjenju i kontroli nereda (nasilja) na sportskim takmičenjima i izrade Strategije, kao i Zakon o sprečavanju nasilja na sportskim takmičenjima u BiH.

Završene su aktivnosti na izmjenama i dopunama Pravilnika o vođenju registra pravnih i fizičkih lica u oblasti sporta na nivou Bosne i Hercegovine. Nakon njegovog usvajanja ministar će u okviru nadležnosti donijeti Odluku o primjeni ovog Pravilnika u Federaciji Bosne i Hercegovine.

Značajna podrška data je organizaciji sportskih takmičenja i manifestacija u Federaciji Bosne i Hercegovine koje su bile u funkciji afirmacije sporta i zemlje u cjelini. U skladu sa Javnim pozivom i utvrđenim opštim i posebnim kriterijima izdvojena su sredstva za podršku 114 programa i projekata. Među njima su svakako najznačajnije tradicionalne sportske manifestacije koje naše ministarstvo održava već duži niz godina: Atletski kup za osnovne i srednje škole, Košarkaška liga osnovnih škola, Tradicionalni velemajstorski šahovski turnir „Bosna 2010“, Nogometni memorijalni turnir „Šehidima i borcima BiH“, Međunarodni rukometni turnir za mlade „Međugorje 2010“, Sedme sportske igre paraplegičara i oboljelih od dječije paralize, XVIII memorijalni judo turnir „Vinko Šamarlić“, Teniski Ladies Open 2010, Teniski Indor ATP Challenger turnir, Bajramski i Božićni turnir u malom nogometu...

Za učešće naših sportista na međunarodnim sportskim takmičenjima bude dostojanstveno i u funkciji afirmacije bogate sportske tradicije Bosne i Hercegovine obezbijeđena je podrška u pripremi i sufinansirano učešće na velikim sportskim takmičenjima. Među najznačajnijim u 2010. godini su bile Zimske Olimpijske i Paraolimpijske igre Vancouver 2010. godine u Kanadi, Sportske igre prijateljstva mladih u Gospiću, Svjetsko prvenstvo u streljaštvu, Evropsko prvenstvo u bilijaru, UEF-a liga šampiona u nogometu za žene, Liga šampiona u ragbiju i niz međunarodnih sportskih takmičenja.

U želji da se obezbijede optimalni preduslovi za trenažni proces, sportska takmičenja i sportsku rekreaciju građana pružena je podrška izgradnji, opremanju i rekonstrukciji sportskih objekata. U okviru finansijskim planom utvrđenih sredstava u iznosu od 450.000,00 KM podržana je izgradnja, opremanje i rekonstrukcija više od 20 sportskih objekata, a u saradnji sa Fondacijom za održivi razvoj OdRaz utvrđen je dodatni posebni program izgradnje i opremanje sportskih objekata.

U saradnji sa Udruženjem pedagoga sporta i tjelesnog odgoja nastavljena je realizacija EUROFIT – projekta praćenja fizičke spremnosti sportske omladine. Po jedinstvenoj naučnoj metodologiji koja se realizuje u svim zemljama Evrope izvršeno je redovno testiranje i praćenje fizičke spremnosti mladih kao preduslova za planiranje i programiranje rada u školama i klubovima. Na osnovu petogodišnjih podataka urađene su, po prvi put u našoj zemlji, i kriterijske tablice.

Obezbijeđena je podrška sportskim aktivnostima invalidnih lica u cilju što brže resocijalizacije i dostizanja vrhunskih sportskih rezultata.

Redovno je održavana saradnja sa kantonalnim ministarstvima i sportskim asocijacijama i institucijama kao i organizatorima sportskim manifestacija u FBiH u cilju ostvarivanja programa utvrđenih obaveza.

Posebnu teškoću, u ovoj godini, predstavljalo je veliko umanjenje sredstava namijenjenih za sport u Budžetu Federacije BiH od čak 55%. S obzirom na značajan broj tradicionalnih sportskih manifestacija i obaveze prema izgradnji, rekonstrukciji i adaptaciji sportskih objekata odobrena sredstva nisu mogla zadovoljiti velike potrebe.